

宋

會

要

全唐文

宋會要 皇子諸王雜錄

太祖開寶六年九月二十一日詔曰周之

宗盟異姓為後此先王所以睦九族而和萬邦也晉王

善召親賢莫二位望俱崇方資夾輔之勲俾先三事之

列自今宜位宰相上 八年七月二十日納右武衛上

將軍焦繼勲女為德芳婦出閣就第 九年十月二十

八日皇子山南西道節度使同中書門下平章事德昭

加兼侍中京兆尹封武功郡王貴州防禦使德芳領山

南西道節度使興元尹同中書門下平章事德昭德芳皆太祖之

子太宗不欲異其呼稱遂降制與十一月五日詔齊王

昭慶公主而下皆稱皇子皇女

廷美武功郡王德昭朝會班宰相上 太宗太平興國

七年七月十三日皇子衛王廣平郡王同日拜同中書

門下平章事詔衛主先赴中書視事廣平郡王以次至

八年十一月三日詔曰並建子弟以藩屏王室申命

輔相以羽翼公朝藩邸之任雖離錄鈞台之寄尤重事分

內外須王等咸自今宰相序立宜在親王上 宰相宋

琪李昉等頓首言漢法丞相在諸侯王下請如舊制帝

曰宰相實總百揆與群官禮絕藩邸之設止奉朝請元

佐等尚幼等劄劾欲其知謙損之道卿無固辭琪等拜

舞稱謝 雍熙二年九月九日楚王宮火帝以元佐素病心疾

意火必元佐也攝置中書遣御史按問置巨校於前元

佐恐懼對云數年已來心神迷亂因重陽被酒夜持簾
幕卷燭炬不令左右知覺遂起此火案具帝遣入內都
知王仁睿謂曰汝富貴極矣迺爾亮悖國家典憲我不
敢私父子之情從此斷矣元佐無詞以對陳王元傑等
洎宰相近臣號泣營救帝涕泗謂曰朕讀書見前代帝
王子孫不率教訓者尚為之扼腕憤歎豈知我家自有
此事朕為宗社計所不敢赦遂下制廢為庶人送均州
安置宰相率群臣伏閭拜表乞留于京師表三上乃許
之命使者監護不通外事元佐帝長子初甚被愛及
長漸驕恣後病恍惚煩躁或經時絕朝請自是屢為殘
忍左右微過必加手刃僕隸過庭輒彎弓射之帝誨責

甚厲皆不悛是歲夏秋疾甚帝以為憂是月以疾小愈
帝悅故為肆赦九日帝宴諸王而元佐以病新間不
預會至暮罷陳王等往謝之元佐謂曰汝等與至尊宴
射吾不預焉是為君父所棄也因發憤夜閉媵妾於室
縱火帝怒遂廢之楚府諮議趙齊王適翊善戴元自以
輔導無狀表請罪帝曰朕教之且不從况汝等邪皆釋
不問止令解職

宋會要

昭成太子元僖

昭成太子

元僖

此誤紀事本末而又不全

許王初名德明太平興國七年七月出閣授檢校太保同中書門下平章事封廣平郡王改名元佑八年十月進封陳王雍熙三年七月改今名十月為開封尹兼侍中端拱元年四月進封許王加中書令淳化三年十一月薨贈皇太子謚曰恭孝仁宗即位改謚曰昭成三年七月甲午陳王元祐改名元僖韓王元休改名元僖冀王元雋改名元份十月甲辰以陳王元僖為開封尹令兼侍中戶部郎中張去華為開封府判官殿中侍御史陳載為推官並召見謂曰卿等朝之端士故茲選用其善佐吾子各賜百萬

及去華就遷左諫大夫又令樞密使王顯傳旨諭以輔
成之意四年八月水部員外郎諸王府侍講邢昺獻分
門禮選二十卷上採其奏得文王世子之編觀之甚悅
因問人內西頭供奉官衛紹欽曰昺為諸王講說曾及
此乎紹欽曰諸王常時訪昺經義昺每至發明君臣父
子之道必重複陳之上益喜賜昺器幣端拱元二月陳
王元僖進封許王韓王元偁為荆南湖南每親臨庶政
豈敢憚於焦勞禮接羣臣無非求於啟沃汝等勿鄙人
短勿恃已長乃可永守富貴而保終吉先賢有言曰逆
吾者吳吾師順吾者是吾賊此不可以不察也庚戌以
皇弟第六子元偁為左衛上將軍封徐國公第七子元

偁為右衛將軍涇國公御史中丞嘗劾奏開封府許王
元僖元僖不平訴于上曰臣天子兒以犯中丞故被鞠
願賜寬宥上曰此朝廷儀制孰敢違之朕若有過臣下
尚加糾撻汝為開封尹可不奉法邪論罰於式淳化二
年上嘗謂近臣曰累有人言儲貳事朕頗讀書見前代
泊亂豈不在心但近世澆薄若建立太子則宮僚皆須
稱臣宮僚職次與上臺等人情之間深所不安蓋諸子
冲幼未有成人之惟所命僚屬悉擇良善之士至於臺
隸輩朕亦自揀選不令姦巧儉倖在其左右讀書課書
咸有課程待其長成自有裁制何言事者未諒此心邪
於是右正言度支判官宋沆等五人伏閣上疏請立許

王元僖為皇太子詞意狂妄上怒甚將加竄殛以懲躁
妄而沆又宰相呂蒙正之妻族蒙正所擢蒙正首以援
引親暱竊祿偷安罷相責宋沆為宜州團練副使三年
十一月己亥開封尹許王元僖早朝方坐殿廬中覺體
中不佳遂不入謁徑歸府車駕遽臨視疾已亟上呼之
猶能應少選薨年二十七上哭之慟左右皆不敢仰視
追贈太子謚曰恭孝元僖性仁孝姿貌雄毅沈靜寡言
尹京五年政事無失上尤所鍾愛及薨追念不已或悲
泣連旦不寐作思亡子詩以示近臣未幾人有言元僖
為嬖妻張氏所惑專恣橫僕妾有至死者而元僖不知
為張氏於都城西佛寺招覓葬其父母儲差踰制又言

元僖因誤食他物得病及其宮中私事上怒命繼殺張氏捕元僖左右親屬繫獄令皇城使王繼恩驗問悉決杖停免掘燒張氏父母塚墓親屬皆竄遠惡丙辰詔罷冊禮但以一品鹵簿葬焉及真宗即位始詔中外稱太子之號張唐英作寇準傳見上按準淳化三年已為罷國未嘗見東宮不知唐英何所據誣謗特甚今不取淫刑事蓋因楚王元佐已見雍熙二年九月開封府判官右諫大夫呂端推官職方員外郎陳載坐裨贊無狀端左遷衛尉少卿載殿中侍御史許王府諮議工部郎中趙令圖侍講庫部員外郎閻象並坐輔導無狀免所居官仍削兩任上始追捕許王察吏將窮竟其事左諫議大夫魏羽乘間言於上曰漢戾太子竊弄

父兵當時言者以其罪答爾今許王之過未甚於此也
上嘉納之由是杖勅者皆獲輕典

端拱元年二月二十三日封皇子元

偁徐國公元偁涇國公並食邑一千戶 舊制國公邑

三千戶今止千有司之誤也自後皇子初封國公猶循

此制 淳化三年十一月二十七日詔先以來月十七

日故恭孝太子元僖行冊命之禮今緣俯逼郊祀其冊

禮權停

五年二月二十七日翰林學士張洎上言準

蓋王元傑改封吳王行揚州潤州大都督府長史者臣
謹按前史皇子封王以郡為國置傅相及內史中尉等
佐王為理自漢魏已降所封之王如不之國朝廷命卿
大夫臨郡即稱內史行郡事東晉永和泰元之際有郗
郗王會稽王臨川王故謝靈運王羲之等為會稽臨川

內史即其事也唐有天下以揚益潞幽荆五郡為大都督非親王不授其揚益等郡或有親王遙領朝廷命大臣臨郡者皆是長史副大使知節度使如段文昌鎮揚州云淮南節度副大使知節度事管內營田觀察處置等使檢校尚書左僕射兼揚州大都督府長史李載義鎮幽州云盧龍軍節度副大使知節度事管內觀察處置押奚契丹兩藩經畧等使檢校司徒平章事兼幽州大都督府長史即其例也今益王以揚潤二郡建社為吳國王居大都督之任又已正領節度使豈宜却加長史之號乃是吳國王自為上佐矣若或朝廷且以長史拜授其如衙內又無副大使知節度事之目儻或他日

別命守將俾臨本郡即不知以何名目除授也臣草制
之夕便欲上陳慮報奏往迴有妨來早宣降茲事體大
實干邦國况吳王未領恩命尚可改乞付中書門下商
議施行帝以制命已出不欲追改洎又再上表引典故
論列中書門下言端拱初韓王改建襄王領荆湖節度
江陵尹冀王改封越王領福建節度大都督府長史今
益王改封吳王苟如洎言改充大都督按官品令大都
督是二品五府大尹五府大都督長史是三品若然則
吳王之品高於二王昆弟之間品秩未當詔俟他日改
正之洎奏遂寢至道二年二月五日帝謂宰臣曰徐
國公元偓涇國公元偁宜各除化外藩鎮宰臣等不諭

久之帝曰朕意非他若除化內州府詔下之日即遣諸
色公人申送書狀慮成煩擾宰臣奏曰親賢不當除化
外但指揮本道不得差人上京可也帝允之由是命元
偁為洪州都督鎮南軍節度使元偁為鄂州都督武昌
軍節度使 七日以越王元份為杭州大都督兼領忠
正軍節度使帝以吳越二王疏封開國當領兼鎮因覃
慶命中書改正之越王以杭州大都督兼領壽春由是
二王盡得所封之地削去長史之號 三年六月六日
詔故涪王廷美追復西京留守檢校太師兼中書令夫
人張氏追復楚國夫人魏王德昭贈太傅岐王德芳增
太保仍遣中使致祭 真宗咸平元年十月十七日宰

臣張齊賢李沆表請序位於諸王下詔以先朝定制不許二年十一月三日詔自親王領大都督府節鎮者勿兼長史五年十一月十八日以皇子祐為左衛上將軍信國公時宰相言故事皇子出閭當封王帝不許而有是命十九日楚王元佐為左羽林軍上將軍

唐德宗朝六軍置統軍秩從二品左右羽林龍武神武是也十六衛置上將軍與統軍同左右衛驍衛武衛威衛領軍金吾監門千牛衛是也今楚王當為統軍而以上將軍命之又王前為金吾衛上將軍按儀制金吾在統軍上將軍之上今之改秩蓋有司失於檢閱

中祥符八年四月二十三日夜營王宮火延燔殿庭五

月三日制安靜武信等軍節度使榮王元儼降授安靜
軍節度使封端王宣制於崇政殿門之外

大中祥符元年十二月十五日帝謂王旦等曰先帝每
命宰臣親王降制則不御崇德殿視朝應有故事其旨
以命宰臣親王視帝王不專耶是日以慶行宰臣親王
節度使皆有制加恩故帝詢及於此四年六月寧王
元偓等言昨奉聖恩俱膺寵命以後弟德存身亡頗有
服式迎授之日合陳音樂有此未便又緣諸鎮節度各
授麻制望頒朝旨先令迎授後之八年四月二十三日
崇王元儼降封端王宣制於崇政殿門之外時崇王宮
火延燔殿庭故也十二月十七日禮儀院言皇子壽

春郡王告勅望令中書進呈別擇良日閤門使押引詣
內東門進納宮中給賜詔令閤門使就內東門依降麻
官告例賜二十四日閤門言儀制宣賜親王告敕閤
門使稱有勅再拜口宣訖播笏跪授侯箱過倪伏興再
拜播笏舞蹈三拜退將來宣賜壽春郡王告勅稱有勅
拜口宣應喏跪授後擬只再拜隨拜萬歲退詔可天
禧二年二月四日樞密院言楚王加恩自來不遣使賜
批詔望依例進內壽春郡王加恩合有迎授恩命詔罷
迎授之禮其告勅如八年例於內東門賜王餘如所請
旌節令周懷政就元符觀內安置治平四年神宗即位
元三月十九日皇弟東平郡王顥言蒙恩授兩鎮節度

使進封昌王仍令所司擇日備禮冊命竊以臨軒冊命
之禮國朝以來雖元功鉅德之臣未嘗敢有當之者伏
望收寢冊命從之

乾興元年

二月二十日詔曰涇王元儼朕之叔父而先朝親禮之甚厚其令中書門下別定對接之儀及諸皇親亦議優加恩命禮儀院言後漢東平王蒼光武子也章帝即位恩禮踰於前世詔沛濟南東平中山四王贊拜皆勿名又按晉武陵王晞元帝子康帝即位贊拜不名今參詳涇王欲望朝會及起居並依故事賜贊拜不名如皇帝見涇王於內中即依先帝見大長公主之儀諸皇親並準詔優與加恩仁宗明道二年九月十六日諸王子孫各乞賜其父為皇太子詔翰林學士馮元端明殿學

士宋綬詳定而元等言周王元祐陛下長兄宜追冊為
皇太子太祖二王太宗五王追卹之典理難均及止可
徙封加鎮兼官而已從之十月二十三日追贈周王元
祐為皇太子詔翰林學士馮元等考詳舊典元等言王
舊無官府其告策請藏宗正寺屬籍堂而遣使焚黃于
永安縣墳次從之 寶元二年十月九日端明殿學士
翰林侍讀學士宗正寺修玉牒官李淑言悼獻太子名
上一字犯聖祖諱請止書曰祐從之 康定元年五月
十二日樞密院言皇子八月十五日生請依郡王使相
例賜襲衣綵帛百匹金器百兩馬二疋金鍍銀鞍勒一
副從之 七月二十五日命端明殿學士李淑修撰壽

國公府表章文字

慶厯元年五月十七日詔以皇故

長子始生而不育將葬賜名昉贈太傅追封褒王謚曰

懷靖

八月八日詔以皇第三子生遣官奏告宗廟

三年五月二十日復給荆王元儼所上公使錢元儼

領荆楊二鎮歲凡給緡錢二萬五千是時西鄙用兵宗

室自刺史以上各進納本州公使錢之半以助邊費帝

以元儼叔父之尊不欲裁損至是復全給之嘉祐三

年二月二十九日詔太常禮院議立周王祐之後禮官

言王薨在下殤之年未有為父之道於禮不當立後從

之英宗治平元年六月二十三日詔賜皇子顥公使

錢二千貫額一千五百貫二年五月十七日權御史

中丞賈黯請自今皇子及宗室卑屬除檢校三師官者
隨其遷序改授三公詔兩制詳議翰林學士王珪等言
按官儀自魏以來以太師太傅太保是為三師太尉司
徒司空是為三公國朝因之六典曰三師訓導之官也
蓋天子所師法今皇子以師傅名官於義弗安蓋前世
因循失於釐正傳不云乎必也正名乎臣以謂自今皇
子及宗室卑者除官並不可帶師傅之名隨其遷序改
授三公之官看詳黯言委得允當詔俟加恩改正 神
宗熙寧四年九月十五日中書門下言淳化五年翰林
學士張洎奏對吳王元傑帶揚州大都督長史長史是
王府佐官不稱名秩尋詔他日親王有恩命落府長史

其後有司失於推行親王猶帶府長史今請罷去從之

八年四月二十六日岐王顥嘉王顥言蒙遣中使賜

臣等方團玉帶各一及準閤門著為朝儀臣等欲寶藏

于家不敢服用帝不許又乞佩金魚以別嫌詔以玉魚

賜之親王賜玉帶元豐二年七月二十七日詔岐王顥

嘉王顥並歲賜見錢八千貫更不以一半折絹 六年

五月十五日詔雍王顥荆王顥乞建外第十餘年中章

數十上入侍寶慈宮非便數諭止之而確然堅請不已

皇太后近亦屢以為言宜依所乞令學士院降詔宣諭

仍令有司度地以聞尚書工部言請以城北馬軍教場

建第從之 閏六月二十二日詔皇子新授檢校太尉

山南東道節度使儀國公佖請給公使並依延安郡王
初除官例二千吏支給其牌印亦令改鑄仍為永例
哲宗元祐元年三月五日詔見修建揚王顥荆王顥外
第兩位各賜銀器并陳設動用等令所屬製造 二十
二日三省言揚王顥荆王顥奏乞遷外第未蒙詔可今
雖名居外而威顏咫尺時奉朝謁固與密通宮禁無異
伏望早賜矜允從之仍令學士院降詔 先是元豐中
二王屢奏乞居外第雖已降詔許之而未果遷出至是
懇請故有是命 二十四日詔二王外第以親賢宅為
名 二十八日詔二王就第日宗室正任以上自府門
送至第仍令親王伴食入內內侍省差官管幹 四月

十二日詔二王各賜銀絹綵錢各五千歲各增公使綵錢五千仍給見錢本府官吏賜與有差 五月六日詔荆王顥妻嘉國夫人王氏進封潭國夫人十四日詔揚王顥男二人荆王顥男七人並遷一官以駕幸親賢宅特推恩也 二年六月六日詔揚王顥妻國夫人馮氏先送瑤華宮入道宜特賜法名守冲仍賜紫衣號希真凝寂大師 先是元豐二年以與王不協送瑤華宮至是始有是命 三年三月四日揚王顥奏有女數人婚嫁及期私用不足望特於左藏庫借交料錢三萬貫月以料錢四貫除折還納從之 七年十一月二十二日詔徐王顥增賜公使錢三千緡 先是三省言南郊禮

畢徐王加恩當賜劍履上殿緣虛文已刪去請易以歲
增公使給錢太皇太后曰嘗有例耶呂大防等對曰仁
宗時荆王元儼增至五萬貫徐王昨亦增賜今纔萬三
千緡乃詔增之 八年二月八日詔皇弟大寧郡王以
下出就外學宜令於親王舊第置學舍及差官二員充
諸王說書就差逐位內侍四員充管幹官 前此太皇
太后宣諭三省曰大寧郡王以下漸長可令就學故有
是詔 三月二十三日詔皇弟諸郡王國公出就外學
各賜九經及孟荀楊子書一部令國子監印給 八月
十八日詔徐王顥許乘檐子至下處處以顥疾故也
紹聖二年十月十三日詔曰朕嗣有令緒獲承至尊惟

先帝休德施及後世憐矣共賴燕謀之錫寶蕃同氣之親頃在妙齡已就外學屬柄臣之僉議援今昔以有言以謂年遠奉朝禮當出閭庶明班爵之義以固磐石之宗朕稽協祖宗之猷深懷手足之愛因之廣孝曷喻至情以義稱恩姑循故事大寧郡王佖遂寧郡王信宜依所請仍令有司疾速修完東宮位次候來春出閭時宰臣章惇等言皇弟大寧郡王等出就外學於今三年年及奉朝而爵號未稱禮秩未備宜及此時進爵增秩啟真王封及大建邸第開府置屬出班外廷入侍長樂以衍茂天支增重王室故有是詔 十一月十一日詔瑤華宮希真凝寂太師馮守冲機封崇國夫人 初三

省奏冀王乞罷冊禮帝因宣諭王之夫人馮氏在先帝時以其不和止令異居爾至元祐已及九年乃更施行聞所居甚敝資用不足可復其國封給賜如故仍葺其所居 三年正月十七日諸王位說書傅楫言將來諸郡王聽讀日乞依舊互講論語孝經孟子如唐詩對句之類一切罷去從之 二月二十二日將作監上修葺皇弟大寧郡王等寧郡王等五位外第地圖詔皇弟五位依親賢宅故魏王位從東先次修葺 九月二十八日楚王顥言臣妻馮氏已蒙恩還復封邑欲望許令歸臣本家未報會王薨其子孝騫復以為請從之 四年二月一日詔故燕王宗國夫人請給依舊全支 以昨

在瑤華宮減半支給故有是詔 十七日三省奏楚王
顥遣表詔將除其子渭州防禦使孝騫為崇信軍節度
觀察留後又奏孝騫與狄諮女為親詔特封齊安郡君
十八日詔申王佖端王佖每年特賜公使錢各六千
五百貫內一半見錢一半折絹 元符元年二月十三
日詔咸寧郡王俱普寧郡王似於三日內選日出閣權
就東宮所有佖等見住位以令有司依先定圖計會騰
那擬截施行 以三省言皇弟大寧郡王佖遂寧郡王
佖並許建第開府今修外第兩位旦夕畢咸寧郡王已
下次當出閣故有是詔 三月三日皇弟申王佖端王
佖奏臣等自忝竊恩榮開國建府託局內城附居宮禁

一日必算三年于茲以理則早合可遷論情則難於遽請蓋陛下隆屬籍之愛厚天倫之親結戀既深懇陳莫遂而又營修_事等多閱歲時比及告功尚需督治願陛下察其至誠先於暇日申敕有司為臣等揀時厯吉早許就居則臣等被陛下友愛之賜曷有窮已從之仍令學士院降詔先是兩上章懇請再降詔不允至是始得請六日中書省言皇弟普寧郡王閭管幹所奏普寧郡王出閭欲依大寧郡王等例日於前後殿退入內奏萬福未時奏安置等從之八日詔五王外第以懿親宅為名候申王佖端王佶入日宗室正任以上自府門送至第仍就賜御筵入內侍省取旨差內臣二員

管幹其後莘王僖簡王似永寧郡王僖出居外第並用此例 十六日詔申王佖端王佖歲賜實給公使見錢八千緡及遷外第特各賜銀絹五千匹兩錢五千緡府官吏賜有差 其後莘王僖簡王似永寧郡王僖出居外第並用此例 二十日皇弟申王佖端王佖遷居外第 二十一日車駕幸申王府翌日辛端王府二年二月六日莘王僖再上表乞居外第從之 三月十七日皇弟永寧郡王僖再上表乞出閤從之 十月十二日詔睦王僖已出閤依申王例添歲賜公使錢三年二月二十五日皇弟蔡王似三上劄子乞居外第從之 八月二十一日詔蔡王似九月三日遷外第是

日令宗室正任以上往送親王伴食及差內臣二員主治其餘外第事並如陳王佖等例 徽宗建中靖國元年七月四日皇弟蔡王似以小史坐指斥繫獄上表待罪未敢朝叅詔令赴朝參如政 八月三日皇弟定王偁兩上表乞遷外第從之 崇寧元年十一月十六日上宣諭輔臣曰昨日內中見蔡王來言語容止頗甚詳熟痛引前咎及再三稱謝欽成升祔恩禮隆厚亦漸向學殊可喜也已勒令勤讀蔡京進曰自古帝王於兄弟一有嫌疑至終身不能解陛下以天地之度篤兄弟之義今日宣諭喜見顏色坦然無疑過古帝王遠甚僉曰陛下至德友愛如此當書聖諭以為萬世之法 二年

二月十四日詔懿親宅改名棣華宅 三年二月臣僚

上言伏聞皇弟蔡王數違義訓陛下天造曲成置而不

問者已踰數四前日蔡王與本位使臣等穿邸第後墻

不冠帶私出宮門步歷廛市與宗室相見飲食買宗女

為妾陛下篤於友愛不忍致法於王已詔有司更不根

治仁不傷恩於是盡矣其出入有縱行之卒垣墻有擅

穿之吏飲食有請召相見之人邸第有提按監臨之官

罪不可赦伏望聖慈除蔡王已得旨更不根治外本官

官吏並乞付有司推究詔依奏送開封府乃依前降指

揮根勘 三月二十四日詔陳王佖昨授守太師其歲

給公使未曾增定可除見給公使外特添見錢三千貫

大觀元年十一月二十八日內出手詔曰朕荷天眷
祐景命有僕承家之慶是生多男年近幼學未親師友
因嚴以教宜及其時京兆郡王桓高密郡王楷可於來
年春擇日出就外學其輔導講讀之官宜以端亮鯁直
有文學政事人充選具稱朕意又詔祥符故事記室翊
善見諸王皆下拜真宗皇帝特以張士遜為王友命王
答拜以示賓禮今講讀輔翼之官職在訓導亦王之友
傳也可如王友例令答拜 政和元年二月二日詔依
太史局選定三月二十七日令定王桓嘉王楷出就資
善堂聽讀 三月二十八日詔宰臣執正官許就資善
堂見定王桓嘉王楷令管幹所定儀申尚書省至日定

王嘉王至堂之中門外迎揖升堂就坐二王西嚮宰臣
執政官東嚮宰執退二王揖送於堂之大門內 二年
九月二十九日詔皇子到堂聽讀特許講筵官時暫到
堂參見時侍讀鄭居中講筵奏事嘗面被旨也 三年
八月十日詔令推貨務支錢一萬貫應副修蓋越王佖
府第 以佖自奏所居府第損漏故也 四年二月十
二日內出手詔曰冠者禮之始所以加有成諭其志也
故聖王重焉朕顧謨天之明命用懌予先王罔敢怠遑
永為萬事之統莫大於禮制以善俗冠之廢久矣眷予
元子孝友肅恭出就外傳既克邁于成德以嫡以年咸
加殿服式協禮經是用求日之吉正纁于朝豈惟敷時

內治假我有家作民孚先寶惟萬邦之慶顧不偉歟格
爾有衆其祇予猷告惟休皇長子桓以二月二十七日
於文德殿行冠禮先是御製冠禮降議禮局載五禮
新儀之首至是舉而行之千載墜典煥然一新四年
十二月十三日中書省言太史局選定皇長子出閣宜
用來年二月七日受冊從之十四日詔皇長子已擇
來年二月初出閣中旬授冊次子嘉王楷可於三月初
行冠禮其冠禮儀令有司詳定以聞嘉王冠儀陳設
如皇長子唯席於房外戶西樽東南甌元酒其詳見政
和五禮新儀五年二月十三日詔親王免赴東宮廷
賀十八日定王桓言臣已依詔旨於二月七日出閣

過府訖臣昨就資善堂聽讀尋常須候通英經筵已開
方取旨定日恭惟聖學高妙羣臣莫及躬御經筵但欲
遵承祖宗故事非待儒臣講說修輔睿明如臣之愚正
當力學不可曠日豈應擬視經筵兼臣問安視膳之外
還過府第綽有餘暇况不同往日深在禁嚴出入不敢
自便今欲乞聖慈許令每日不拘早晚但稍有閒隙即
請學官赴廳講讀所貴為學日益有以副聖慈眷之意
從之 二十三日詔皇子建安郡王樞文安郡王杞今
春出資善堂講讀其管幹官比附定嘉王聽讀例施行
三月八日皇帝御文德殿觀視皇子楷冠禮 六年
正月十一日手詔朕席祖宗之休承天眷命既安斯寢

是生多男篤慶本支以綿繼序皇第三子嘉王楷令德
孝恭率履不越溫清定省志養無違嘉其有成亦既就
傳今年踰志學禮當異宮眷茲天性之慈祇若國章之
舊可於仲春擇日出閤 二月二十二日詔皇子嘉王
可於今年四月內擇日趨朝 四月十八日詔提點御
前生活所翻修燕王侯府第 以俟自陳所居府第損
漏故也 五月二十四日內出手詔比閱國史見故益
王顥與神考情義甚篤在元豐末忠言正論力排異意
功在社稷今其子孫興追奉之禮未曾褒顯非所以勸
可檢會故實取旨褒錄乃加孝參檢校少保孝穎德慶
軍節度使 十一月十九日詔嘉王楷差提舉皇城司

整肅隨駕禁衛所兼提舉內東門崇政殿等門 七年
四月十二日詔皇子安康郡王栩出就資善堂聽讀可
特依此推恩本閣祇應使臣管勾所手分各轉一官白
身人補副尉祇應人各轉一資並依舊祇應 五月十
九日內出手詔燕王俱第三子與依長子有章例賜名
授官支破請給等 八年三月十一日詔十六日嘉王
楷令赴集英殿試仍給食就東廊排設幕次什物 二
十五日詔嘉王楷依貢士唱名賜勅謝恩 二十七日
集英殿唱名詔嘉王楷有司考在第一不欲令魁多士
以第二人為榜首 是日詔嘉王楷已賜第一人上舍
及第許謁謝先聖與題名記并同年小錄所有期集並

免尋詔謝先聖亦免赴 二十八日詔嘉王府學官陸藻嵩次仲張勸勸學有勞各與遷秩內張勸仍賜緋章服 五月九日詔同年小錄止用第一人皇嘉王楷字德遠 八月二十日嘉王楷言近兩具劄子乞就舊行外第居住止蔣蒙降詔不允即令居處春坊之側仍近禁庭出入阿止甚不遑安况初修外邸已見就緒伏望早付有司擇日施行詔從之仍依太史局選定閏九月十九日出居外第 九月二十二日中書省言皇子嘉王閏九月十九日遷就外第檢會革王遷入外第日宗室正任以上自府門送至外第仍就賜御筵及賜銀絹錢五千匹兩貫本府官吏等第支賜仍差官管幹支散

並依舊制

十二月十四日詔朕荷天休命慶多男子

建安郡王樞文安郡王杞出就外傳亦既踰年聞禮通

詩年逮志學可依故事出閣檢會前後條例施行十

九日中書省言燕王俱奏契勘本府內知客宣政大夫

康州防禦使李詢仁自差到管勾職事備見勤謹欲望

聖慈候本人任滿日特令再任從之宣和元年三月

二十三日駕幸蕃衍宅景王位五月二日皇子鄆王

楷奏臣自蒙恩就府第以來庶事畢備惟是未有監書

可廣聞見欲望特降睿旨國子監印造頒賜從之十

二月二十六日詔皇子徐國公棣可來春擇日出就外

傳四年三月二十七日皇子肅王樞奏除授合得恩

例七、今有都監入內武功大夫康州防禦使楊端入內
武功大夫貴州刺史王褒等乞改轉一官詔楊端轉一
官依條回授王褒轉行遙郡一官五月六日詔皇子
祁王模已經裹頭出閣本閣官吏諸色祇應人並依昨
文安郡王裹頭例各與轉一官七月三日詔鄆王楷
差將來冬祀大禮都大提舉禁衛行宮使六年正月
二十八日將作少監孟忠厚言修葺蕃衍北宅第二位
所用材植物料萬數浩瀚欲望將本監年計并抽稅到
材木竹箔物料顏色外路應副起到數目並擬入本位
不許官司攔截取撥抽分和買及諸路不得改易兌借
若已團網起發不得中路改撥應副他處所有在京抽

稅竹木箔等亦乞據所得之數悉歸本位權行住罷應
副諸官司取撥支遣候本位畢十一月依舊從之 七
年七月二十五日工部尚書兼蕃衍宅翊善張勸等奏
契勘皇子沂王已選日出就外第所有合用牋表等文
字緣未奉指揮未敢供納詔令供納今後依此 十二
月二十一日詔蕃衍北宅罷修已修者逐局拘收未修
者近已遷移民舍依舊給還將來皇子出閤日可於十
位內居止不須新建府第平陽郡王可以與祁王同居
南康郡王可以與康王同居鄆國公可以與景王同居
韓國公可以與濟王同居建安郡王可以於已廢潁景
西園嘉國公同居餘三人尚襁褓第八位便可以三人

同居溫國公可以與沂王同居 欽宗靖康元年二月

七日以祕書省著作佐郎沈晦假給事中從皇帝肅王

樞使幹離不軍

紹興三十二年

孝宗已即位未改元

九月一日

詔皇子貴州團練使愷可持授雄武軍節度使開府儀

同三司進封慶王食邑一千戶食實封四百戶令所司

擇日備禮冊命

同日閤門言皇子依儀制親王赴垂

拱殿并後殿起居於大殿後入一遇合班處景靈宮行

香立班合押宗室一遇常朝日參并後殿起居輪差閤

門提點同提點兼祇應報引入殿知閤門官引至起居

屏及遇轉官朝謝殿內知閤門官引揖一麗正及和寧

門外待漏垂拱殿門外內及殿門外侍班景靈宮行香

門外待漏殿門外待班其閤子并合在西壁與宰臣閤子相對或無設置去處即權於宰臣閤子之次釘設詔衣 孝宗乾道二年十月十四日詔皇第四子早薨可追賜名恪封邵王謚悼肅 十七日詔恪特賜淮康軍節度使開府儀同三司 七年二月八日詔皇子雄武軍節度使開府儀同三司慶王食邑四千戶食實封一千六百戶愷可依前皇子開府儀同三司特授雄武保寧軍節度使判寧國軍府事提舉學事兼管內勸農營田使追封魏王加食邑一千戶食實封四百戶令所司擇日備禮冊命 二十四日中書門下省言魏王判寧國軍府置長史司馬各一人記室參軍事二人詔並以

二年為任任滿與陞擢差遣 十五日詔皇子魏王愷
出鎮寧國府妻華國夫人韋氏男皇孫攄見今厯內諸
般請給等輿隨帶前去接續幫勘 韋氏隆興二年郊
恩以信國夫人封華國夫人 十八日詔內東門司皇
子魏王愷生日節序物色等並令依舊取賜 二十一
日詔皇子魏王愷妻韋氏封韓魏國夫人 是日上御
選德殿宰執進呈上曰舊無此例今以封可乎宰臣虞
允文奏曰陛下因建儲之慶特示恩章進兩國亦無不
可上曰亦須與封大國允文奏曰大國著于令者二十
有八陛下財擇遂有是詔 二十三日詔皇子魏王出
鎮今左藏南下庫祇備金三十兩銀一萬兩令承受取

賜 二十五日詔魏王愷出鎮可依元祐五年文彥博
例宴餞仍依賜宰執已下喜雪體例排辦 三月四日
宰執侍從宴餞魏王于玉津園 二十八日詔今年四
月二十四日皇子魏王生日特差內侍陸彥取賜牲餼
四月二十二日宰執進呈皇子魏王賜夏藥宰臣虞
允文奏曰前二府用百兩銀合一具親王莫易以金否
上曰金合亦好參知政事梁克家奏曰舊來前二府以
下夏臘藥率遣中使宣賜後以其起動州郡令進奏院
遞賜而已上曰聞中使所至州郡不無煩費允文奏曰
此為害甚久紹興之末諸路安撫制置使及諸軍主兵
官始從遞給賜自乾道初載雖前二府亦皆罷遣今親

王領藩恐須遣中使以示陛下恩意上曰甚好二十
三日皇子判寧國府魏王愷奏將來天申節臣合前開
赴闕進香上壽詔依五月三日詔入內侍省魏王
到闕差使臣謝安道傳宣撫問賜金合茶藥十一月八
日客省言依格簽賜宰臣親王以下正旦寒食冬至節
料在法止有宰臣執政官奉使出外取旨今皇子魏王
愷判寧國府仍令本府將合賜物色依數排辦就賜今
後準此八年十月十八日詔會慶節皇子親王愷令
內中上壽紫宸殿赴坐

宋會要

淳熙元年五月三日詔皇子魏王府見破親事黃阜院
子輦官儀鸞翰林司厨子教駿兵級諸色人已降指揮
祇應及七年與轉一資已經轉資見接續祇應人每及
七年可特與轉行一資今後準此十二月五日詔皇子
魏王出鎮寧國府已及四年今改鎮明州其記室參軍
承受幹辦官各與減三年磨勘醫官指使宅素司承受
官下主管文字書表司抱笏直省官節堂使臣各與減

二年磨勘親事官輦官兵級院子儀鸞司翰林司厨子
教駿梢工犒賜有差二年十一月九日詔親王府記室
依舊同在京職事官體例施行從魏王府記室參軍耿
秉請也七年二月十日宰執進呈皇子魏王遺表上杖
淚曰朕向來躡次建儲者正見此子福氣頗薄耳然亦
不料如此之大也趙雄等奏昔建儲之初天下猶未能
盡識聖意及今方曉然所謂知子莫若父知臣莫若君
上曰朕以宗廟社稷之重斷然行之趙雄等奏陛下愛
子之心初無原薄特以聖見高遠為宗廟社稷計斷然
行之而不疑然而茲事甚難雖以唐太宗之明猶且疑
惑不決此天下所以咸仰陛下之明又服陛下之斷也

於是詔長史蘇諤司馬陳蒼舒記室元伯源梁汝永並
特與各轉一官本府一行官屬使臣諸色祇應人兵給
等各先次特與轉一官資並與存留在府接應祇應其
請給按月接續幫勘支破理任酬賞並依見行指揮候
至服闋日別行取旨結局日記室二員仍與陞擢見闕
差遣同幹辦二員與添差釐務路分都監請給等依正
官例餘人願赴部者與添差釐務合入差遣一次諸色
人兵等願養老者聽特與帶行舊請在外居止候歸葬
日官屬使臣諸色人兵等各借請給三月並從遺表之
請也四月八日詔戶部自今年四月為始每月支供錢
一千貫文白粳米四十石次色米一百石赴故皇子魏

王府充本府位中并支散等用候服闋日別降指揮詔
令省倉每月供納白粳米四十石次色米一百石從吉
日減次色米五十石十二年五月四日詔恩平郡王府
見差破親事官等已降指揮祇應及十年各轉一資見
接續祇應人每及再十年可特與轉行一資今後準此
五月九日詔莊文太子府魏惠憲王府官吏諸色人除
已轉官員外自今並依乾道三年十二月七日指揮年
勞更不推恩五月二十五日詔魏惠憲王府觀察與教
授接見禮書教初接見觀察冠帶教授穿束對拜兩拜
就坐點茶訖候講畢復坐點湯揖退各年節相見禮教
依此其尋常上講即背子相見並觀察就主使教授分

輸入講堂卯入午罷行移文字合用印記下文思院鑄造銅印一面以魏惠憲王府小學教授記一十字為文講堂令講論語讀孟子日後如有申請事件徑申尚書省施行以教授黃唐等條具下禮部指定故消是命九月七日詔入內內侍省東頭供事官梁襄特差幹辦皇孫平陽郡王府都監比附諸王府都監作上等三年替十六年六月二十四日魏惠憲王府小學言呈姪國公已行冠禮進封所有讀授周易近已終篇合接續改讀經書乞自今後免申尚書省敷奏止移牒本府依次序接續改讀如講徹一經亦乞準此魏惠憲王府小學教授欲止作魏王府教授繫銜從之

皇孫

皇孫謨

皇孫悛

皇孫悛
撫
撫

宋會要 皇孫謨

本朝皇太子生子為嫡皇孫封秩比皇子

大寧郡王謨欽宗皇帝長子政和七年十月生八年正月賜名授檢校少保常德軍節度使封崇國公後辭節度使國公改授防禦使靖康元年正月自高州防禦使除少保改昭慶軍節度使進封大寧郡王三月加檢校少傅改寧國軍徽宗政和八年三月二十七日提舉太子左右春坊言皇孫近已除授官封所有諸般請給人從乞申明降下詔並依見除官差破閣九月二十一日中書省言准提舉左右太子春坊申今來十月二日皇孫謨生日緣未有支賜令格正文詔依宗室節度使令

格施行

全唐文

中興會要

皇孫愔愔

高宗紹興十六年七月二十二日吏部言晉安郡王二
子令取索補官條法取旨大宗正司具到宗室賜名授
官令格體例認麻以上親右內率府副率袒免親保義
郎昨紹興五年內右千牛衛將軍安邵男賜名授官賜
名居端補右內率府副率詔可賜名愔愔並補右內率
府副率二十二年二月十六日詔晉安郡王弟三男賜
名愔依長男次男例補官二十一年六月二十一日詔
晉安郡王長男愔可改賜名愔二十八年正月二十二
日詔晉安郡王長子右內率府副率愔可特轉右監門

衛大將軍榮州刺史請給等並依行在赴朝南班宗室
例支破三十年正月二十八日詔普安郡王次子愷可
特授右監門衛大將軍請給等並依行在赴朝南班宗
室例支破四月一日詔皇子建王長子儋可特轉蘄州
防禦使次男愷可特轉貴州團練使惲可特轉榮州刺
史告內並帶皇孫字

全唐文

乾道會要

皇孫挺擴擴柄

孝宗乾道元年六月四日禮部太常寺言皇嫡孫降誕
今依典禮合遣官擇日奏告天地宗廟社稷諸陵擴宮
詔依二十七日左通議大夫叅知政事兼權知樞密院
事兼充德壽宮使兼權提舉編修玉牒兼修國史錢端
禮率文武百僚上表言恭遇六月一日皇嫡孫降誕道
昌羣生既躋仁壽之域慶流奕世遂收家嫡之祥廟社
光輝華夷鼓舞恭惟皇帝陛下仁濟萬類澤被四遐坤
治一陶德之所施者博本支百世邦其永孚于休遂開
磐石之宗來應維熊之吉臣等猥叨毗倚獲與榮懷歌

天保之章欲仰伸於歸報賦螽斯之什願益詠於衆多
入奏帝道風隆垂休祥於聖祚皇枝有衍貽燕翼於孫
謀歡益兩宮慶均九服臣等恭惟光堯壽聖太上皇帝
陛下妙三皇之道行五帝之仁寶曆瑤圖雖同脫履之
視金枝玉葉自開綿瓞之祥爰卜有周之世年大錫文
王之孫子臣等叨居近弼共展慶儀喜動天顏未數舍
飴之樂勢隆國體更觀磐石之封二年六月九日詔皇
太子愔男皇嫡孫可賜名挺除千牛衛大將軍五年十
皇^子月恭王惇男皇孫可賜名^挺除福州觀察使封榮國公
十一月十三日詔皇子恭王惇次男皇孫可賜名擴除
右千牛衛大將軍六年十月三日詔皇子慶王愔男皇

孫可賜名摠除左千牛衛大將軍七年二月十五日詔
皇子魏王愷出鎮寧國府男皇孫摠見今曆內諸般請
給等與隨帶前去接續幫助

又淳熙九年

五月四日詔皇孫柄補右千牛衛大將軍十年正月十一日皇太子宫左右春坊言皇孫英國公赴赴垂拱殿後殿起居其侍班閣子及立班後駕行馬上下馬處乞下閣門條具申請仍差破抱笏祇應三名書表客司各一名請給等乞用宗室觀察使下見行禮例其親事官及白直兵士乞下皇城司步軍司依格差撥詔侍班處就宗室正任閣子遇忌辰權免行香餘依既而閣門條具宗室序位同者以尊卑為次若封爵係嗣王郡王國

公郡公者序位在本官之上少前立其起居立班行馬
合在宗室觀察使郡王之次從之三月十一日詔皇孫
英國公閻書表司杞笏祇應人等請給依已降指揮反
給外每人特月支添給錢一十貫其祇應人內公當宿直
祇應人十一年七月十九日詔皇孫英國公閻差破親

事官步軍司宣効等依使臣等例每及八年與轉一資
仍自今降指揮下日為始八月七日詔皇孫英國公擴

將來納婦應合行事件可創下承受官取旨施行次年

四日始命十二年四月三日皇太子宮左右春坊言皇

孫平陽郡王近除安慶軍節度使進封平陽郡王先承
指揮請給生日支賜公使錢並與依格全反所有祿粟

欲乞依南班節度使士峴體例依祿格全支從之五月
四日詔皇孫安慶軍節度使平陽郡王擴納婦已選定
朝奉郎新知濠州韓同鄉物次女為親劉付承受所取旨
施行八月二十二日詔皇孫安慶軍節度使平陽郡王
擴婦韓氏與封新安郡夫人特依宮人支破諸般請給
九月二日詔皇孫千牛衛大將軍柄與破請給依祿格
全支本色八日詔入內內侍省東頭供奉官梁兼特差
幹辦皇孫平陽郡王府都監令比附諸王府都監作上
等三年替十一日詔皇孫平陽郡王府見差破幹辦指
使宅案書表客司楷書抱笏等並特與依昨來恩平郡
王府書表客司已得指揮見行幫諸般請給等則例自

到府供職日放行批勘餘依本府已得指揮十月十日
詔皇孫平陽郡王府同幹辦譙全雍特與改作內知客
名色十六年正月三日詔皇孫柄除耀州觀察使嘉國
公十二日詔皇孫柄所生母卜氏特與封信安郡夫人

宋會要

卷三 雜錄

濮安懿王子二十七人孫一百二十六人曾孫五百五
十三人嗣封者共十六人 士輅 淳熙三年正月除
少傅六年十月除少師依前昭化軍節度使充醴泉觀
使七年十二月上遺表特贈太傅追封安王 士歆
仲湜第十一子政和八年九月三日生宣和四年內該
遇天寧節賜名授太子右內率府副率靖康元年五月
遇欽宗皇帝覃恩轉太子右監門率府率建炎元年九
月遇高宗皇帝覃恩授右千牛衛將軍紹興十年二月
因父遺表授右監門衛大將軍是年五月轉右監門衛
大將軍榮州刺史二十年七月轉右監門衛大將軍貴

州團練使二十六年閏十月轉右監門衛大將軍眉州
防禦使二十七年八月轉和州防禦使三十二年六月
轉宣州觀察使乾道五年四月轉昭慶軍承宣使提舉
佑神觀是年十一月授保康軍節度使依前提舉佑神
觀淳熙八年二月襲封嗣濮王依前保康軍節度使提
舉佑神觀九年九月除開府儀同三司依前保康軍節
度使充醴泉觀使十三年正月除少保十六年三月除
少傅紹熙五年八月除少師依前保康軍節度使充醴
泉觀使慶元二年九月上遺表贈太傅追封懿王不
祛士懷第三子宣和四年十一月五日生靖康元年
該遇乾龍節賜名補保義郎累轉武功郎慶元三年四

月授皇叔祖福州觀察使襲封嗣濮王五年十二月轉
武安軍承宣使提舉佑神觀是月上遺表贈開府儀同
三司追封蔣國公 不璽 士勳第三子宣和四年十
一月二十四日生紹興四年該遇天申聖節賜名補保
義郎累轉武經大夫慶元六年七月授皇叔祖利州觀
察使襲封嗣濮王開禧三年六月以寧遠軍承宣使提
舉佑神觀上遺表贈開府儀同三司追封安國公 不
傳 士銖第四子建炎三年十一月二十六日生紹興
五年該遇天申聖節賜名補保義郎累轉修武郎淳熙
二月三月授皇叔太子右監門率府率四年五月轉右
千牛衛將軍十年八月因父遺表授右門門衛大將軍

十二年五月轉右監門衛大將軍吉州刺史十三年二月轉右監門衛大將軍成州團練使十六年閏五月該遇寧宗皇帝覃恩授皇叔祖右監門衛大將軍眉州防禦使慶元元年正月該遇寧宗皇帝覃恩轉和州防禦使是年六月轉隨州觀察使開禧元年七月轉安遠軍承宣使提舉佑神觀三年七月除昭慶軍節度使依前提舉佑神觀襲封嗣濮王嘉定三年六月除校檢少保十年六月上遺表贈少師追封高平郡王 不嫖 士石第二男紹興六年四月二十五日生紹興十年該遇天申聖節賜名補保義郎累轉武翼大夫嘉定十一年三月授福州觀察使襲封嗣濮王十二年六月上遺表贈

開府儀同三司追封惠國公 不凌 士禱第六男紹
興十五年正月十六日生紹興十九年該遇天申聖節
賜名補保義郎累轉武德郎嘉定二年七月換授皇城
祖右千牛衛將軍十三年正月授福州觀察使襲封嗣
濮王十五年五月轉奉國軍承宣使十七年六月上遺
表贈開府儀同三司追封惠國公

神宗熙

寧二年三月二日中書門下言皇族宗哀建仙遊縣君
影堂乞役兵填池請許之詔所差兵士若不限定日月
必是居常役使無期放散可與百人令役一月 閏十

仙遊縣君
宗哀之母

一月二十八日詔祖宗之子并濮國公並令傳嫡襲封已封公者將來更不襲封 三年十二月二日詔三司

令左藏庫歲特支錢五十貫充濮王宮公用本位俸錢更不尅除 先是太宗正司奏宗樸狀先奉御批令兄

弟量尅料錢入濮王宮庫用為四仲月祭饗支用而近降指揮不許尅皇親俸錢故有是命 四年九月二十

二日詔賜濮王子通州防禦使宗隱芳林園宅一區仍

計口給屋

後宗傳宗瑗宗蓋依此

七年四月十二日詔濮安懿王

子宗暉宗綽宗勝宗楚各賜芳林園宅地令將作監計口修蓋 八年七月十八日詔濮安懿王女德安縣主

等六人並進封 元豐二年四月詔王第十一女第十

八女並進封郡主詔王女六人並特贈料錢月三十千
元符三年三月詔王女曹誦妻延安郡主特改封郡號
與孫一名閭門看班祇候仍添料錢及春冬衣生日禮
物等大觀元年二月詔王女永安郡主特封兩郡主賻
宗曜十年十月十六日詔濮安懿王諸子襲封濮國公
主奉祠事仍候濮安懿王諸子承襲編即傳長孫翌日
封宗誼濮國公 十一月十四日詔皇伯邑州觀察使
宗暉權奉祠濮安懿王神主 二年五月八日詔濮安
懿王子贈鎮寧軍節度使同中書門下平章事陳國公
宗治云亡諸子不曾推恩長子右監門衛大將軍仲忽
可領文州刺史 十一月二十七日詔淮康軍節度使

同中書門下平章事濮國公宗暉奉濮安懿王祠事

三年四月四日詔皇伯濮國公宗暉進濮陽郡王濮安

懿王子孫皆遷一官女增俸二十千孀婦進封一等無

品可進者改大國王夫人任氏弟皇城使昌州刺史澤

遷嘉州刺史

四人並特轉一官四年正月五日詔贈武寧軍節度

使兼侍中彭城郡王宗衮先帝濮邸同母長兄宜比故

宗誼例量與加等推恩妻張氏特封國夫人男三人各

轉一官五年五月二十五日太宗正司言奉詔濮安

懿王子故楚國公宗蓋特與一子官其子仲江今已從吉

乞依已得指揮遷一官從之仍更與一子轉官令太宗

正司具名以聞六年五月三日詔濮安懿王女建安

郡主夫左藏庫副使劉承緒特差帶御器械郡主王夫人任氏所生英宗之季妹也 七年二月十一日手詔白朕自嘉祐中從先皇帝入居儲宮已二十餘年今日緣真故伯宗輔因得趨謁濮安懿王祠堂顧瞻諸伯叔父所存者無幾皆齒髮衰遲儀形非往日之比深明惻然其議加恩諸父命濮陽郡王宗暉為鎮安軍節度使進封嗣濮王餘推恩有差 三月十四日詔嗣王雖著品令然自國初以來未嘗除授故有司不能昭其恩數近除宗暉嗣濮王宜下御史臺閣門參定以聞 十七日御史臺閣門言本朝舊令班儀嗣王在郡王上宗姓又在同列之上近例郡王領使相者得吏二人前引雖

出特旨緣嗣王恩數尤宜加隆今參詳嗣王若止隨本
官立班當在本班之上使相即用雙引從之四月三
日詔濮安懿王女吳承渥妻長樂郡主劉承緒妻建安
郡主梁鑄妻同安郡主夏大醇妻永嘉郡主可並增俸
錢三十千 九月七日詔嗣濮王宗暉主奉祠事宜比
宗姓使相郡王歲增公使錢二千貫厨料給親王例三
分之二 二十四日又詔宗暉奏子與太子右內府率
率女上三人與縣主 哲宗紹聖元年六月一日詔故
嗣濮王宗暉令戶部以係官屋一百間賜本位居住
二十三日大宗正司言宗暉先以濮國公主奉濮安懿
王祠事後封嗣濮王自係主奉不當更於街內稱說今

宗暉薨宗晟已封嗣濮王其主奉祠事不須銜內帶行從之十一月二十六日詔宗暉係嗣濮王遺表恩澤依宗樸例外特更與一男恩澤二年二月二十八日紹宗暉子仲損已至止官外仲爰仲說仲璉仲志各轉一官令大宗正司候服闋日申中書省三月二十八日三省奏嗣濮王宗晟乞遺表恩澤與男仲御仲聘仲儀轉官詔依宗暉例四月十九日尚書禮部言嗣濮王宗愈乞今後仲饗依宗暉宗晟例輪男二人充攝亞終獻行禮及許以一子自隨供侍從之八月七日尚書戶部言嗣濮王宗愈欲依故宗暉等例歲添公使錢二千貫從之十月九日詔嗣濮王宗愈係英宗皇帝同母

弟遺表恩澤依宗暉宗晟例特加一名 十一月二十
二日尚書戶部言嗣濮王宗綽乞依故宗暉例歲添公
使錢二千貫從之 三年三月二十一日詔宗暉主奉

濮王祠事歲久仲損特與轉小鎮留後 七月十九日

詔宗綽遺表恩澤仲縻仲譽仲淮仲誦各轉一官第十
四女封長安縣主所生母竺氏封福昌縣太君第十五
女封同安縣主所生母盧氏封壽昌縣太君 四年七
月二十三日禮部言仲縻奏父宗綽遺表恩澤乞奉聖
旨依宗晟例所有添厨物料亦合依例支破從之 八
月二十六日三省言嗣濮王宗楚遺表恩澤乞將合得
恩澤併同授男仲賜等推恩詔宗楚乃英宗皇帝同母

弟與五人恩澤男仲疇特與併兩人轉兩官仲璩轉一
官令大宗正司候服闋日申中書省 五年三月四日
同知大宗正事仲御言叔宗祐近授嗣濮王以久病不
出時遣諸子照管先祠而仲厥專用事不能致恭祭祠
之禮宗祐疾甚仲厥強其父行衝冒山氣遂薨于永安
縣不俟朝命昇柩登坂必有所損不孝如此望加顯黜
詔宗祐遺表恩澤與以次人仲厥更不推恩 元符元
年八月二十五日宗祐係英宗皇帝同母弟其子仲璫
仲玲仲懋仲徹仲觀各轉一官 徽宗崇寧三年九月
十五日詔嗣濮王宗漢皇族近屬自今遇天寧節及大
禮特許奏一女為正縣主 大觀元年正月十一日手

詔興德禪院乃英宗神考誕育之宮粵自熙寧營建迨茲告成親臨謁款迨惟曩昔言念茲德惕然感懷孝思之報宜有褒顯其祠漢安懿王子孫可特與推恩疾速具合推恩人取旨於是嗣漢王宗漢進檢校太保改保平軍節度使諸孫仲御仲損移鎮加檢校司空進封郡王仲增仲僕仲廉仲癸皆為節度使仲憫仲樽為節度觀察留後二年正月一日赦文國家承平日久宗室繁衍自我英祖起於濮邸入繼大統濮王之後於屬雖親於服已遠如不字之子論正服則猶是總麻視正統則已非袒免無賜名授官之制無祿廩賜予之法比聞貧乏匱困或不能自存朕富有天下而五服內親僅同

民庶非強本之道欲盡絕親親之禮而承統之重義所不敢夙夜以思當使恩義兩得然後為稱應濮王孫士字可依仲字不字及不字之子並依士字恩數條例宗女隨其字行等第施行庶不失承統之義而曲盡人倫之親 其後因有司陳請繼有詔旨者五事一宗女及其夫當隨所陞字行恩例詔前此已出嫁者亦當依此二仲譙之女於赦恩未降之前用一代有官法出適李彥嘉今既升等當用二代有官而繫親財禮粧奩之數亦當增舊詔宗女身所請給恩例并其夫恩澤並依赦其一代有官者免改正繫親財禮粧奩更不重給三不字行宗女夫內無官之人大宗正司更不勘驗今既升

等則其夫當授三班奉職係大宗正司取會保奏若前
此有違條令者欲依吏部再嫁降等法推恩詔已成親
者更不降等四不字及不字之子既升與士字同則於
屬為祖免然條令所載蔭補恩乃斷自總麻以上詔不
字及其子十歲以上並特賜名授官五歲以上及長子
候天寧節依總麻親例推恩五士字不字以下宗女隨
字行等第則宗字行女不當用此恩例詔宗字女已係
縣君特封縣主無邑號者封縣君 三年六月十三日
詔去歲受寶赦恩濮王孫士字依仲字不字及不字之
子並依士子恩數宗女隨其字行等第可作一時指揮
九月二十二日詔故嗣濮王宗漢許於西墳濮王園

內為塋地仍官給石門石藏

故妻郭見存妻王亦許附完

妻王氏增

料錢一倍為六十千生日衣賜並給男四人各轉一官
女二人封縣主男女所生母六人並封縣太君親事官
許存占二人軍士許差十人並影前祇應王氏充代檐
子親事官許差六人門下醫人與二名補助教部監內
支客直省官班行充代殿侍祇應及親事官具到宮年
月比擬推恩書表司客司通引官各賜錢十千營葬量
給汴舟往來輦輜重存日支添厨錢永遠給賜大葬免
差監護官仍不隸敦睦司統轄守墳軍士差十五人以
宗漢遺表陳乞也 政和五年七月二十日穎昌府奏
檢會政和令諸犯濮安懿王諱者改避今據臨穎縣穎

陽鄉北管村人民姓氏有從言從襄家犯濮安懿王諱除令迴避外乞申請改賜姓氏詔改賜姓遜七年三月詔故宗室仲的濮安懿王孫年高官卑未嘗求進聚族百餘人無所依賴殊可矜憫其見居室宇可特撥賜本位子孫永充已業其妻滕氏可特封國夫人恩例請給並依仲綰新婦例倍給九月十六日故太師惠王宗楚新婦濮國夫人尹氏言乞與男仲璩轉官女族姬二人各封宗姬從之以尹氏故夫宗楚曾任嗣濮王特從其請宣和元年四月二十六日太宗正司奏右內率府副率士符狀伏念臣後濮安懿王孫素來棲心道教喜慕虛無幸遇朝廷興隆道教伏望將士符見任官

資特賜保明數奏比換披戴入道檢會仲忽劄子節文
欲乞今後宗室曾經犯公罪徒私罪杖者並不許陳乞
入道奉御筆依奉又忽仲劄子節文欲乞今後應宗室
無妻室願入道披戴者並聽經大宗正司提狀勘會無
違礙保明具奏聽旨仍許帶行見破請給以充乳藥之
資其宗女孀婦願往禁宮觀披戴者准此奉御筆依所
乞本司尋取會到商王宮濮王位狀勘會士符自來並
無諸般過犯係見破請給之人未有妻室今來所乞別
無違礙保明是實詔依所乞與換翠微郎 五年十一
月十九日詔濮安懿王孫密州觀察使仲璩昨有故母
濮國夫人尹氏合得遺表一十八年減年未經牧使特

與仲璩轉承宣使

以上續宋
朝會要

高宗紹興元年九月二

十六日中書門下省奏勘會嗣濮王仲湜男右監門衛大將軍榮州團練使權知濮安懿王國令士街右監門衛大將軍吉州團練使士術昨自南京扈從車駕至揚州及迎奉濮安懿王神主神貌過江理宜褒賞仲湜言乞差士街充溫州太廟神主享獻官其退下闕差士術並不添支請給其差下人別與差遣從之仍各特與轉行一官 四年五月三日詔皇叔檢校少傅靖海軍節度使開府儀同三司兼判宗正事嗣濮王仲湜第十四男士峴可特授太子右內率府率 九月二十八日右監門衛大將軍貴州團練使士輅言先祖宗樸係濮王

第二男元贈太師中書令追封康王改封惠王緣濮王
第二十八男宗楚已封惠王詔改封恭王五年五月九
日士輅又言濮王第八男宗暉男仲爰已封恭王詔宗
樸特改封和王七年七月二十一日詔嗣濮王仲湜
薨令臨安府諸寺院共聲鐘三千杵將來出殯日令行
宮太常寺致祭九年十月七日嗣太宗正事士儼奏
嗣濮王初除授依神宗皇帝詔旨女止三人除正縣主
男並與正率先臣仲御任使相嗣濮王日有男十五人
並不曾陳乞上件恩例今止存四人臣弟士嫌士遜在
四人之内乞許將上件恩例與士嫌士遜轉行一官詔
依所乞士嫌特與轉正任防禦使士遜轉通郡刺史

十二月十八日檢校少師光山軍節度使開府儀同三司同封太宗正事齊安郡王士儼嗣濮王仲理自靖康之後止存男士泰見任右監門親衛大將軍乞將仲理襲封恩例於士泰於見任官上轉行詔與特轉遥郡刺史 十年六月二十一日太宗正司言濮安懿王主奉官仲偁身亡未見差人承襲主奉祠事詔令士儼主奉其承襲別聽指揮 二十一年八月二十四日太宗正司言權主奉濮安懿王祠事依近例係差見任宗官長契勘昭信軍節度使知太宗正事士大合權行主奉從之 二十三年二月二日安慶軍承宣使同知太宗正事^士街奏安德軍節度使權主奉濮安懿王祠事士大身

亡見闕主奉官詔差岳陽軍節度使開府儀同三司充
萬壽觀使士樞 十月十七日詔安遠軍承宣使同知
太宗正事士街差權主奉濮安懿王祠事 二十五年
七月二十四日詔令禮部^太常寺討論嗣濮王典故大
宗正司具合襲封官申尚書省取旨 二十八年八月
二十七日詔嗣濮王襲封令有司檢舉太宗正司言元
豐中濮王位最長宗暉襲封嗣濮王其後並係濮王位
宗室最長之人承襲即今本位最長係皇叔建州觀察
使知濮安懿王園令士輅合襲封從之 十一月十七
日昭化軍節度使嗣濮王士輅奏祠堂官及臣合破馬
丁抱笏祇應六人書表客司通引官七人宣備兵士三

十五人并臣出入接見諸處投下文字並依外官法伏
覲宗暉初除嗣濮王日得旨男與正率女三人與縣
主今臣止有兩女乞並封縣主其踏逐祠堂主管香火
官理為資任支破本等請給下所屬出給付身內知客
一員依例支破茶湯錢一十五貫并抱笏祇應乞踏逐
已未到部小使臣校尉副尉或白身人代充內有官人
理為資任并書表客司通引官依例每月各人支破添
給茶湯錢一十二貫上行官吏乞隨祠堂香火官於紹
興府幫勘所有臣本身應請給舊請支賜宣借等於行
在幫勘如遇臣生日乞令所屬取賜從之 同日士輅
又奏濮安懿王祠堂昨因嗣濮王仲湜迎奉前去紹興

府就報恩寺西挾屋權暫安奉逐時薦享委是隘窄今
本寺主奉位廳堂見今空閑乞下本府量行修葺充祠
堂安奉從之 同日士輅又奏乞依前嗣濮王仲偁例
赴赴朝參及依士諸例在外居止令臨安府應副廨宇
如每遇仲享乞依仲偁士套已降指揮將合破親事官
前去出入免見辭候回日隨班起居從之 三十年四
月二十一日詔修武郎不異係濮安懿王近屬可特依
不悅等例與換文資 十二月二十五日昭化軍節度
使嗣濮王士輅奏濮安懿王神主神親下官吏兵級并
臣合破內知使臣等一十四人每月請給等乞下紹興
府經總制錢內按月支給從之 以上中興會要 孝宗隆興元

年三月五日昭化軍節度使嗣濮王士輅言臣年踰七十並無男有女夫保義郎司公度未授差遣乞降閤門祇候詔依 二年六月十五日檢校少保昭化軍節度使嗣濮王士輅言司封令襲封嗣濮王之人奏男太子右內率府副率臣止有一女欲乞將合得男恩數與女加封從之 乾道元年三月十一日士輅言臣年踰七十拜跪稍艱乞依士衍例赴六參起居仍特免差諸處行事詔從之 十四日士輅又言濮安懿王祠堂合差破守把剩員四十人先蒙指揮下紹興府差撥後來本府節次差到十人例皆老疾相繼事故見今止存三人緣神貌四位所管供帳數目浩瀚欲望特降指揮於

四十人內更裁減十人令紹興府差撥廂軍三十人抵填詔從之 十月四日詔皇叔祖檢校少保嚮德軍節度使知大宗正事嗣濮王贈少師追封瓊王仲偁賜諡恭惠 十一月十七日士輅言濮安懿王園令士程在任恭奉神主神貌并親監督修造園廟龕室屋宇並皆如法乞士奇前任園令體例將兩次該遇園令月日每一年與減一年磨勘仍許通理轉官後歷過年月接行收使於見今官上特與轉行詔從之 三年十月四日詔士輅已除開府儀同三司其生日支賜并使臣依已降指揮外所有應干恩數請給人從等並依居廣例施行 十七日詔岳陽軍節度使開府儀同三司充萬

壽觀使主奉濮安懿王祠事贈太師追封昭王士樽賜
謚恭靖 四年三月十三日詔禮物局如將來空閑令
臨安府將上件屋宇同嗣濮王見住宅予一併撥賜嗣
濮王士輅永遠居住仍與量行修葺 七年十一月六
日士輅言濮安懿王神主神貌見在紹興府光祿寺奉
安每年四季仲享合差三獻官行禮其亞終獻依格合
差子姪充已前係紹興府行司差南班官權充今來行
司已併歸行在宗正司其紹興府並無南班官可差兼
士輅係襲封初獻官蒙先降指揮如遇士輅忽患亦令
差官權攝行事欲特降指揮遇四仲享月就差嗣濮王
位子姪或紹興府見任寄居侍闕宗室依長次序許士

輶牒紹興府逐時權差行事庶得崇奉祖宗仲享不致
闕誤詔依

二年七月十二日士輶言叨冒襲封每月請給止比宗
室正任防禦使今先乞依祿格全支本色仍免折支及
每歲生日令入內內侍省依舊全支取賜詔依

雜錄 淳熙元年

六月九日詔大宗正司於濮王諸位下見存不字一十
七位每位各選一人能循守規矩無疾病過犯人材可
為儀表者令本司選擇取旨與比換環衛官赴朝參
並不作陞等恩教每人月特支米十石候官至合請未
日住支

以日參南班人數

十二月十二日吏禮部言有

詳判大宗正事嗣濮王士輅奏請選擇列濮王下十七
位不字比換南班乞於舊格稍加陞擢今若依元換出
格法復令換入恐請給微薄詔依宣和六年正月八日
指揮與對換南班官其所換人內諸衛大將軍每月特
添給錢一十貫將軍正副率各添二十貫仍依已降指
揮月給米十石候轉至合請米日住支非今來十七位
下選擇到人不得援例二年四月二十二日嗣濮王士
輅言將濮王位近屬不諤等已比換南班今見赴赴朝
參各人依官序於步軍司止差破兵士一人乞各人特
與雇募五人從之八月二十九日詔濮王位宗子宗婦
每月食料依舊全與放行

以前曾住支今從也十一月二

十一日詔嗣濮王士輅第七男不屈所生母李氏特封
宜春郡夫人既而是年十二月十三日參知政事龔茂
良等進呈李氏依第三等總麻宗婦支破請給上曰此
可行否茂良等奏李氏係士輅妾恐不可依宗婦上曰
極是請給不足較名分豈可亂也可留下文字當以此
喻之四年八月九日嗣濮王士輅言省部將臣少傳合
得給使減年等恩數比之少保並行減半乞依昨除少
保體例全與放行詔依樞密使見行條法放行既而刑
部言士輅昨除少保已依初除樞密使例全行出給減
半再除少傳亦已作轉廳例減半出給公擬今再乞全
給從來樞密使即無兩次陞遷並作初除全給之例詔

依轉廳條格減半出給九月二十七日嗣濮王士勗言
昨該遇大禮恩數緣臣別無兒男承受遂奏補親從姪
不憊文資內安排降等補登仕郎赴春銓試中第一名
出官緣姪不憊元係中訓郎親民資序差御前軍器所
監造官其不憊父知西外宗正事士程歿於任所已降
指揮依例得遺表恩澤四名與男不迭不憊特添差不
釐務一次未曾收使今乞依士瑋男不執不流例與姪
不憊初官上特換承務郎仍乞將前項二男差遣恩數
併與不憊收使依前軍器所監造官詔特依所乞十月
九日詔士歆第七男賜名不擅時善切六年七月五日詔
皇叔祖保康軍節度使提舉佑神觀士歆妻碩人梁氏

封齊安郡夫人八年四月二十九日詔嗣濮王士歆男

忠翊郎不闕特授太子右監門率府率從士歆請也九

月二十一日太宗正司言太子右監門率府率不闕元

係忠翊郎用父士歆襲封嗣濮王恩例特換授前件官

其本身請給生日支賜人從等及添支錢米人從敕號

乞依不諤等前後已得指揮體例支破詔依所乞初

當以未有承降指揮兼口前十年二月二十九日詔右

千牛衛將軍不捨為伯士韞持服今已服闋其義可嘉

特與轉右監門衛大將軍令赴朝參先是大宗正司言

漢王亮並無男兒不捨自幼父母早亡蒙伯父鞠養乞

養乞解官持服依所乞候服闋日取旨旌異故有是命

十一年十月十四日詔保康軍節度使開府儀同三司

行率字
貳年二月
二十四日
義郎前監
福州都作院
不慢與換率
將副率

充醴泉觀使嗣濮王士歆男右監門率府率不關換授
南班已逾三載依前嗣王士輅姪不舍例特與轉行一
官從士歆請也十一月二十四日大宗正司言奉詔於
濮王下懷王位選擇不字宗室一員比換南班官日赴
朝參及諸般行事填不諤身故關本司今選擇到修武
郎新添差東南第五副將饒州駐劄不庾持身康謹無
疾病過犯見年五十歲欲填不諤闕其請給人從並乞
依不諤等已得指揮詔依與換率府副率以昭慶軍承
宣使知大宗
正事不惠本司昨得旨於濮王下十七位各速擇不字
號祖元親宗室一員比換南班日奉朝請有濮王下信
王位未慢
擇到不慢
保康軍節念其老耄寵異無所不至但其身後並無兒

最蒙春遇

女每遇享祀止是娛媼李氏奉其香火槩之人情深可
憐憫乞令大宗正司於濮邸宗室中選擇資性明粹昭
穆相當年及十五或二十以上者一人與士輅為其後
嗣使士輅銜恩瞑目於地下而臣闔族亦均被無窮之
惠大宗正司奏選擇到忠靖郎添差平江府排岸兼船
場公事不熄資性明粹舉族稱賢委是昭穆相當堪充
繼嗣從之十二月三日詔少保嗣濮王士欽特與依士
輅例除上壽六參郊禮外其餘並免起赴淳熙十六年
四月一日詔嗣濮王士欽已除少傅除見今差破幹辦
使臣抱笏祇應外有應千恩數請給人從等並特依昨
除少保前後已得指揮十月三日少傅保康軍節度使

充醴泉觀使嗣濮王士欽言昨蒙聖恩憐臣衰老令臣
除上壽六參郊禮外其餘並免赴赴今來恭覲已降指
揮十月二十八日車駕幸候潮門外大閱臣猥聯近屬
忝出肺附願乞扈從隨班以後每遇車駕出城令臣準
此從之紹熙元年八月又言恭覲指揮進呈至尊壽皇聖
趙班起十一月二十日太宗正司言武翼郎不廷進狀
乞比換南班照得不廷係舒王位下不字宗室依昨降
指揮合比換南班諸般請給文賜人從等並乞依不謬
等已得指揮施行吏部奏不廷已降指揮於武翼郎上
比換南班今來雖無武翼郎換官條格自合就以次脩
武郎格比換兼照得昨不僥不諧並係從義郎亦無從

義郎條格並用次等兼義郎格換官了當今來不延換
授南班合就修武郎格比換正率從之紹熙元年五月
十八日詔士峴男不恂可特與除右監門率府率並依
士歆男不闕昨來已得指揮施行二十二日華州觀察
使知大宗正事不黯言右監門衛大將軍撫州刺史不
黯身故委是班列蕭疎照得本位修武郎不慮性資孝
友儀矩舒詳乞填不黯闕比換南班赴朝參及應干
行事所有諸般請給生日文賜人從等並乞從一般南
班不諤等前後已得指揮施行從之二年四月二十二
日詔嗣濮王士歆第七男不檀依元降指揮改正官封
換授正率免赴朝參其請給人從等並依見今一般

趙朝南班宗室文破四年七月十一日詔皇叔祖故少
保昭慶軍節度使元醴泉觀使贈少師士峴特追封平
樂郡王慶元三年四月四日詔武功郎添差淮東兵馬
鈐轄趙不秬除觀察使襲封嗣濮王以大宗正司言奉
詔嗣濮王士歆薨令其合襲封人聞奏今除無士歆一
般字行外照得以次不字行宗室年甲次第排歲數
最長宗室不秬年七十六歲合該襲封故有是命翌日
宰執進呈侍從兩省臺諫集議今後嗣濮王乞取屬近
行尊年齒最長無過犯疾病者為之已得旨依京鎭等
奏曰此議固是但屬近行尊而昏耄者則閱時不久又
煩朝廷推擇如近日安定子恭可曾識面及其薨背便

要許多恩數臣等欲於集議內添不昏耄三字上曰年既昏耄必無長久之理何澹奏如此則有可決擇不專取一人上曰可五月二十一日福州觀察使嗣濮王不祛言叨冒襲封合得諸般請給歲賜公使錢春冬衣折洗生日大禮等乞依士歆未襲封任觀察使體例支破施行從之四年二月二十五日詔嗣王濮不祛長男善輻次男善輯與授太子右監門率府率其請給生日支賜人從等依不諤體例支破從不祛請也六年四月二十四日詔武經大夫趙不豐除觀察使襲封嗣濮王以大宗正司言已降指揮襲封嗣濮王臣僚集議參照濮安懿王之後屬近行尊年齒最長無過犯疾病不昏耄

者為之不拘中外選擇奉詔令具合襲封一名聞奏餘
照應已降指揮施行既而商王宮濮王位狀今挨排選
擇到不疊年七十九歲合該襲封故有是命二十六日
率執進呈程松劄子乞以嗣濮王所居為公廨不可占
留上曰得者多是年高不能長久便認以為已有安得
許多宅子與之先是古諫議大夫兼侍講程松言竊惟
承襲封爵所以從德繼世昭世不忘此國朝甚盛典禮
粵自濮邸衍慶聖聖相承通求親賢必重必敬推原本
意蓋俾之奉承祭祀以仰慰祖宗在天之靈豈惟寵以
高爵華以居第富貴而宴安之專為一己私利哉從來
推擇非屬近行尊德齒俱備不在此選是固無可言者

至於王之為爵品秩尊崇雖則承襲而封抑亦起躡為甚夷考國朝典故自宗暉而下至於士歆嗣濮王者凡十有六員咸以觀察使節度使或使相或郡王次第除授而後得之自庶官徑授觀察使而遂襲封者慶元三年不祛一人而已黃緣相承今為定比儻議更革則咈人青惟是所居屋宅用為私第永遠拘占理有未安紹興二十八年嗣濮王士輅奏乞令臨安府應副解字既稱解字則非私家第宅明矣因而居止奄為已有獨不思國家尊親體貌至隆極備乃不能自營室廬為身後子孫之計貪得無厭是誠可愧夫一人襲封得宅一區又一人繼之則又得之嗣王之襲封不已則有司之治

宅亦無已臣非為縣官靳賈毫末人言籍籍以為不可
爾而況合該襲封之人率是年高且如不祛之來年已
七十有六甫踰二載旋即薨背所居解字不復以
與後人數年之後嗣王公解將何地經營所謂襲封祇
為已私其於奉祠本意安在欲乞自今嗣濮王第宅今
見該襲封人居之前後相承以為公解不許居拘占將
作私第庶於事體合宜揆之公論亦為允當至是進呈
從之十二月二日詔利州觀察使嗣濮王不璽長男善
輔次男善濟並與換授太子右監門率府率其請給人
從等依不諤已得指揮施行從不璽請也同日詔嗣濮
王不璽特與依士欽例除上壽六參郊禮外其餘並免

赴赴嘉泰元年三月二十二日利州觀察使嗣濮王不
璽言竊見武德郎趙不器老成諳練荐厯親民乞差充
濮安懿王園令替趙善玘闕從之開禧三年七月詔襲
封嗣濮王不傳男善與特換皇叔祖右千牛衛將軍主
管佑神觀長女特封永康縣主次女特封仁和縣主嘉
定十二年八月三日臣僚言國家襲封王爵主奉祠事
從獻郊廟所以崇德廣恩羽儀磐石非特示一時之恩
寵而已嗣秀王屬族既近班位自高以序受封固無可
議獨嗣濮安定郡王近年以來率自下僚例行承襲且
多癯老疾病不能起跪至有賜履在列竟未嘗一覲清
光而赴朝謁者照得光降雖有擇年高行尊之文然高

宗皇帝朝儀王冲湜以德望俱隆越仲綜而逵拜武德
郎士黈次當襲爵以其官卑乃命士儔權奉祠事越十
六載始正士儔之封則斟酌劑量又在宸意初不拘一
定常行之例也今若專以德望為逵則又恐啓爭奪之
風初經營之路謂當參稽中制自後凡有合該封襲之
人先行下寄居州軍審驗委堪拜跪即與保明申上津
遣至宗司銓量繼赴都堂審察閣門引見奏事訖然後
取旨除授或序當承襲本州宗司見其不能拜跪與特
轉一官及一子恩澤文武隨資以華其老邵於以次人
內更行逵襲庶幾尚年尊德之典並行奉先睦族之意
增重從之

秀王

二十年二月十六

日詔晉安郡王第三男賜名惇依長男次男例補官并
第四女與比附施行四月十五日吏部言晉安郡王
第四女欲比附宗室曾孫總麻親任節度使女封碩人
條格施行從之

秀王會要

淳熙十六年十月二十五日詔皇伯伯圭已除少師所
有合得應干恩數請給人從生日取賜等並依昨除少
保少傅日前後已得指揮施行紹熙元年七月一日臣
僚言近者陛下仰體慈皇孝愛之意特建秀邸置園立

廟襲爵承祀昭合彝章惟是南班一事未見舉行似為
闕典竊見治平三年春追崇濮邸是秋王之子孫幾二
十人皆自環衛而序遷其官以示優寵朝廷方崇秀邸
以衍慶源一時恩禮要當加隆而居南班者止師夔一
人非所以疆本支而固磐石也前此未建秀邸欲賦以
祿則不免責以吏事今秀邸已建而猶責以吏事他日
或不免於吏議治之則傷恩不治則廢法揆之人情亦
有所不安者莫若令換授歸之南班俾其身無吏責而
享富貴之榮日奉朝謁而承兩宮之眷底幾上合典故
下當人心益闡慈皇孝愛之意詔令吏部開具申尚書
省取旨十日詔秀王諸孫換班宜加優異師揆師垂與

師高帝高師奉与換正任國棟使

換正任觀察使二十一日詔伯圭賜第久弊兼合就建
秀王祠堂令兩浙轉運司同臨安府應辦修蓋聽從本
府措畫九月二十四日詔秉義郎閣門祇候張卓為係
秀王夫人姪久在殿陞應奉詳熟昨丁憂今已服闋可
令依舊赴閣門供職特不作負闕請給人從並依游恭
等已得指揮餘人不得引例二年十三日太保安德軍
節度使充萬壽觀使嗣秀王伯圭言臣竊自念猥叨嗣
封見奉朝請所有本位南班宗室欲望令臣就行主管
庶幾事體歸一從之二十三日太宗正司言薦獻祖宗
及諸處行事本司見只將濮王位及吳益王府南班宗
室輪差所有秀王位換授南班乞朝廷指揮詔嗣秀王

位南班宗室輪差薦獻五月二十一日詔秀王孫女縣
主二人並與加封郡主請給依祿格支破本色於所在
州軍經總制錢內幫支其出嫁女夫張以續史彌廓恩
例各特與轉兩官既而臣僚論似續彌廓恩數太過乞
各轉一官從之 元年正月五日詔皇伯檢校少保興
寧軍節度使提舉佑神觀師夔除開府儀同三司依前
興寧軍節度使充萬壽觀使三年五月十六日吏禮部
言大宗正司裁決嗣秀王乞秀安僖王襲封子孫合得
恩數照得濮王位士字依正統係是袒免親該過大觀
二年所降寶赦陞依仲字係作總麻親恩數其不字係
非袒免親善字係袒免外世並陞依士字各係袒免親

恩數秀安僖王位下伯字論正統袒免外一世師字二世希字三世與字四世孟字並係袒免外五世今來伯圭所乞秀安僖王下子孫與濮安懿王下子孫論正服其伯字係期親師字係大功親希字係小功親與字係總親麻孟字係袒免服紀若比濮安懿王下子孫其孟字善字並係袒免親事體一同其餘所乞各依服屬合得恩數陞等定日各照應條制施行從之泰嘉元年五月二十七日詔秀安僖王祠堂近日居民遺火延燒今禮部太常寺討論典故議詳以聞開禧元年二月詔襲封嗣秀王師揆奉朝請七月二十一日詔崇王元賜第以居民遺火沿燒不存師揆未有居止支降度牒一百

道會子二萬貫依顯仁皇后等宅體例自行蓋造三年
四月六日詔師揆長女特封威寧郡主次女特封和義
郡主嘉定三年五月十三日詔所揆男希德希福係孝
宗皇帝近屬並除直祕閣

二十九年五月五日詔普安郡王長男懋納婦已
選定直龍圖閣錢端禮長女應合行事件令主管所取
旨施行